

華

陽

集

華陽集卷第三十一

金壇後學于文熙校

雜文

祭張彥智文

嗚呼天生偉人堂堂傑異旣博於才抑豪於氣悼往古之不返追流風於末裔躬信義而急人處阨窮以游戲妻孥困而號啼賓客喧其沓至苦俗態之卑陋納圓鑿於方枘獨昂昂以在羣思雲飛而孤唳觀負抱之如此宜少見於行事誦平生之所爲亦表表於當世方建炎之已酉海內俶其鼎沸渡五馬於烏江

守孤城之如鬼駭盜兵以環拏顧最爾其何恃伏忠
信而出郊逆酋渠以單騎解血刃於垂及曾一鏃之
不試倏移帥於廣陵膺戎虜之孔熾略旁州以煨燼
眇千里而睥睨公開門而待之衆果却而遠避賴尊
俎之折衝赫威名而逾厲天子異其材能詔徙近而
作蔽惟建康之都會委荒城而晝閉招餘孽於散亡
謂非公其誰治卽銜命以入境咸息黥而補劓出閭
閻於瓦礫洗江山於昏翳弔野鬼之沉寃布春耕於
新惠觀施設於三州曾未盡其一二俄感物以懷歸
動尊鱸之逸思叩帝閭而露章拜琳宮之仙吏反故

鄉以訪舊侶漁樵而求志方却掃以就閒肯輕身於
權媚昔先祖之定交俾通家以相繼結盟好於金石
沐芳馨於蘭蕙有如某之薄陋辱知過其子弟甫弱
歲而承顏勤白首以無替每暇日之招邀吐肺肝而
自誓走童僕之歡呼極芳鮮於庖馘傾家釀之新芻
投車轄以留醉粲一笑以相樂率百金而屢費鄙後
出之纖巧獨純誠以見謂迫之官於番陽慘離情而
分袂阻萬山而道遠馳緘滕以來諄謂兵戈之未息
將會面之難值徵斯言之不祥卒永隔於下地嗚呼
哀哉歛不摩棺葬不臨隧邈音容而遐想撫汎瀾以

華陽集 卷之三十一
出涕驚祥祭之甫臨纔一拜於墓次旅肴酒以致奠
跽陳詞而略意後時而來心則有媿

祭外祖母倪氏文

恭聞令德發聞自初歸我外祖蘭芬藹如外氏族大
母儀是勗靜專柔閑不戒而肅曷彰厥善是生叔舅
起家白屋士林之秀帝欲用之召從百里安輿迎侍
象服煒煒孝養方隆命也不弔訃音自南痛靡有極
追念蒙愛誨言具存歲時間見視猶已孫中山端歸
一拜堂上曾未閱歲遽哭遺像嗚呼哀哉人亦有言
五福罕備亦旣備矣則又兼貴况復有子諸孫滿前

相其令終尚何憾焉唯是慈訓永隔千古莫以致哀
淚墮如雨

祭丁明仲文

嗚呼明仲藹茲令德何辜于天而奪之亟夫好名者
爭尺寸之進而趨利者競錐刀之直孰如明仲有官
不仕欣然自適日散千金了無難色此其高情逸韻
視夫世俗之規規何啻十百而千億也方且左琴右
書枕流漱石舒幽思而嘯詠對清樽以朝夕友先賢
於三徑五柳之間與之合堂而同席若其考古論今
旁搜遠撫或深入佛海或直造聖域以至醫經神巧

之功地理陰陽之蹟吳陸畫手鍾王筆蹟莫不極精而研思毫分而縷析嗚呼明仲旣賢而又多能胡爲不壽一病至此極也雖然人生如夢百年瞬息達人
大觀何得何失惟典刑之徂盡後來無所矜式念此風俗使我心惻矧予葭莩之親契好薦於疇昔航一水以相過每論心而莫逆嗟桑榆之暮景期林壑以遠迹誦招隱而振衣指迷途以先迪將駕言而從之忽千古之永隔嗚呼哀哉日月如駛及此窀穸懷話言其如在邈高風以寥閬蹕陳詞而莫訣揮老淚之橫臆

祭張彥度文

同姓所先友義相勗惟公於我愛均骨肉初公南來
歲在乙酉客中見我傾蓋如舊卜居吾邑契好日親
趣舍利害有懷必陳爲飢所驅宦游契闊繾綣不忘
書無虛月佐幕兩州鳴琴三縣至輒有聲鉅鋒稍見
衆驚且喜抱能將施公曰休矣善刀藏之奉祠歸來
我方屏處白首對談過相勞苦曰惟此身來日無多
一笑相樂吾其敢踈別去未幾話言猶在命也不淑
忽焉弃背嗚呼哀哉公兄寶文我之先友國士期我
親愛篤厚斯人旣沒典刑在公不憖遺一吾誰與從

華陽集 卷之三
豈無交游莫如公久四十五年夢覺何有聊陳薄奠
送公西山追懷曩昔淚下逆泉

祭胡氏碩人文

人之家法實由中饋允矣令德流芳必異仰惟碩人
生有殊質歸我舅氏見謂良匹承上撫下以身周旋
達于宗黨靡有間言婦順母儀既克兼備凡厥家事
不嚴而治舅方從宦進蒙上知曰惟在公皇恤我私
匪其弗恤閭職有付處不失宜吾復何預暨登法從
內助益勤湯沐疏封絲綸載新一時光寵有燁其盛
豈無所本惟德之令謂宜百年永膺福祉胡爲一病

遽至不起嗚呼哀哉昔我外祖有子三人伯仲蚤世
叔也獨存天旣相之俾克顯大曷又抑之而奪其配
我爲其甥劬勞念母時過外家庶慰孤苦骨肉同體
舅惟我親碩人遇我親愛惟均親之愛之義則有舅
如已子弟恩久彌篤去冬之別言猶在耳方卜再見
遂隔生死訃音初聞哀極號慟何哀之極母黨爲重
瞻彼下湯歸窆有期永懷懿範胡寧忍違恭陳薄奠
侑以楚些情見乎辭聲淚俱墮

祭陳美成文

粵惟陳氏世有令德如公父祖我幸及識先德往矣

典刑在公方嚴厚重有祖遺風尚其家學博文約禮
篤志不倦惟公是似再世濟美亦旣兼之以戒以守
厥譽四馳譽之云何曰誠長者修身齊家飾以儒雅
顧我衰遲里閭相屬佩服典常蘭芬蕙馥乃以女孫
爲其子婦冀聯姻好相親以久孰云一病遂至此極
堂堂若人何去之亟逾五望六壽則不允族半青紫
時獨不逢皇天畀付不充有命有德有義不逢何病
餘慶流行在其後昆身雖永已不亡者存詞以寫哀
一別千古尚想平生淚墮如雨

祭甥丁伯升文

嗚呼吾甥氣貌堂堂何賦分之多蹇而受命之不長
未孩而孤旣孤而病或者以爲不祥惟吾令妹獨有
是子不幸而嫠居曰吾尚何爲乃切自慕於共姜我
先大夫與先夫人日夜念之欲奪其志以嫁而妹以
甥之故指天自誓凜然有甚於秋霜觀夫守義若是
則其所託於襁褓者厚矣譬猶草木之芳固將封之
植之擢危根而孤秀期拱把於千章以吾甥出於積
德之後且夙承其母訓又有伯父叔父教以義方吾
故謂甥異時必能自立而襲其餘慶浩乎其未可量
也豈知事有大繆年未及冠而天奪其母零丁一身

蓋僅存而若亡有婦甚賢亦相繼而下世豈猶未已
又哭其長子之喪夫憂患百罹至此極矣嘗試推否
泰之消長尚庶幾其享後福而壽康奚慘罰之太甚
嬰此微恙而禍變卒駭於非常嗚呼哀哉甥舅恩義
如何可忘獨捨我以先去其孰知余心之惶惶而况
平生志願命有所制百不一償我是用追悼反復爲
出涕而淋浪雖然有形同歸於幻滅一死何足以悲
傷顧或脩而或短等炊夢於黃梁聊攄詞以寓意薦
餘哀於一觴千古永訣歸安于藏

祭舅李侍郎文

惟公與我親則爲舅道義之交實同朋友故或出或處一話一言未嘗不竭誠盡心以相佐佑如何天奪之亟一病遂至於不救嗚呼哀哉公生我後十有三年我之知公益自其幼有若梗楠豫章擢於喬林雖拱把之微已見其蔚然而孤秀及其長也讀書考古夜以繼晝議論英發智略輻輳則又若騏驥驊騮一日千里駸駸乎得夷途而馳驟故常自謂材高者必能高舉器大者斯可大受於是發策決科蜚英騰茂當聖主收人材致太平之時能自拔於葦流躡羣英而並造內而法從之嚴外而大郡之守獨以望實得

之易若取諸懷袖且天之生公既畀以能名又寵以
祿厚是將全其所亨而終以期願之壽不謂令德壯
猷方植而仆痛功名之雅志曾萬分之未就嗚呼哀
哉公之材氣剛明諒直蓋天性之自然無所矯揉以
是而遊於世故能任誠無欺狗義不苟雖遇事煩劇
而蟠根錯節交乎前必使之毫分縷析情窮理究如
庖丁之解牛迎刃砉然顧何勞於擊剖此固公之所
長而人亦以是稱公同一辭於萬口初公罷官而歸
以病來告亟往見之猶能爲我彊起握手道舊頗怪
其二年之別白髮蒼顏氣消容縐方咨嗟而歎惜公

忽笑曰子言何陋人生固有一死孰先孰後譬猶客寓時至則行何畏之有以是見公智中所存死不足以動之而况世間得失利害其又奚疚追懷曩昔每聞擊節慷慨之談必有以發吾覆今我老矣事乃大繆母存之念旣絕同心之盟莫副命也不淑安所歸咎情慙恍而愁思淚淋浪而噎嘔聊陳薄奠詞以爲侑諒靈寃之未遠冀萬一於三嗅

祭叔排岸文

昔我先君唯叔同氣兄友弟恭華鄂韡韡于時燕私某每侍旁一話一言敬佩典常先君旣沒嗟我何怙

儀刑所瞻獨有叔父恩義載昂慰此孝思如何不弔
叔又弃遺嗚呼哀哉堂堂吾叔得官歲晚材不及施
有言莫踐浮沉里社夏屋渠渠旣富且樂宦達誰如
謂宜百年享有全福七十非夭唯曰不足人曰不足
叔也何憾有子若孫卜安于坎如某寒薄老去疇依
杖屨未遠舉目煙霏陳詞莫訣以寫哀慕詞莫究哀
淚墮如雨

祭弟彥飾文

昔我先祖頎然五孫皆以世業種學績文季孟之間
君勇且仁屢戰詞場誓將策勲事旣大謬弃如飛塵